

四庫全書

集部

欽定四庫全書

雪樓集卷四

元 程文海 撰

玉堂類藁

制詞

榮祿大夫平章政事同知徽政院事左都威衛  
使王桓故曾祖父永安州都監增贈榮祿大  
夫平章政事追封冀國公謚武康制

尊祖敬宗思廣天下之孝序功錄德遂及勲臣之先以

勵事君以勸教子具官王某故曾祖父某官某齊家有  
法裕後惟仁基四世之忠良備累朝之任使出則為良  
將帥入而為名公卿具有顯庸實由積德是用表勛錫  
爵節惠易名誕布恩榮式光泉壤嗚呼河山渺渺載瞻  
大國於岐梁子孫繩繩永底厥后為堯舜尚迪爾後式  
副朕心可

故曾祖母李氏追封冀國夫人制

為國以禮恩宜體於群臣致位崇班封乃及於三代具

官王基故曾祖母李氏惟和惟一有德有功主饋共稱  
其賢率下咸服其愛遂鍾賢子克收名世之勛施及文  
孫屹作中朝之佐是用尊以小君之號從其列土之封  
庶極哀榮以示恩意嗚呼積善有餘慶必基閨閭之間  
為國生良臣允副筭珣之盛幽靈不昧明命其歆可

故祖父金吾衛上將軍知中山府事左副都元  
帥善贈銀青榮祿大夫大司徒追封冀國公  
謚武靖制

有功當封雖遠必錄無德不報既往可追矧予宣力之  
臣復有詒謀之美宜隆命數以備哀榮具官王某故祖  
父某官某以忠孝立身以仁義發迹用士致其死力治  
民得其懽心入真定之兵三百餘人定中山以南四十  
二郡不殺降以規賞常捐己以活人為吏則稱其廉循  
為將則號為智勇宜子孫之盛大皆德澤之深長是用  
倣周法以易名表異方而啓宇仍躋崇秩庸示殊恩嗚  
呼仕至執金吾緬想勲勞之舊名在太史氏榮書邦邑

之新英爽如存休命勿替可

故祖母李氏追封冀國夫人制

我有世臣其功可及於古人稱賢婦厥德猶誦于今爰  
錫寵章儼封大國具官王某故祖母李氏勤儉慈愛柔  
嘉靜恭宗族視為範儀舅姑稱其孝謹內勉君子外濟  
時艱發倉廩以賑歲飢脫簪珥以紓民責有脂澤以遺  
後宜湯沐之從夫嗚呼詒厥孫謀夙夜每勤於儆戒烝  
畀祖妣春秋永治於禴祠苗裔相承昌熾未艾可

故父榮祿大夫平章政事僉書樞密院事兼徽  
政副使左都威衛使贈金紫光祿大夫大司  
徒上柱國追封冀國公謚忠穆慶端加贈推  
忠宣力功臣太傅開府儀同三司上柱國仍  
追封冀國公改謚忠武制

居朝廷之上必有腹心之臣在軍旅之中則有爪牙之  
士惟是二者鮮能兼之緬懷勛舊之賢爰舉褒崇之典  
具官王某故父某官贈某官某番番良士翼翼小心世

祖識其有為裕皇知其可任出則扈從警蹕入則守衛  
宮庭營威武而儲峙富強軍神鋒而訓習明練平山東  
鎮清口遇賞則辭饗和林剪乃顏有功不伐庶幾古之  
良將信為國之重臣雖握樞衡如在堯庫宜後人之允  
蹈致大賚而啓封表四字以策勛視三公而開府載疇  
偉績改錫嘉名嗚呼金城湯池嗟不慙于一老岐山壺  
口今以作于爾邦永襲休明式昌嗣膺可

故母追封冀國夫人李氏仍冀國夫人制



為臣居丞弼以顯其親推恩及祖宗況在其母用光泉  
壤申衍脂田具官王某故母追封某夫人李氏育德高  
閨來嬪茂族夫能盡臣道皆內助之得人子復列台衡  
亦義方之有訓雖偕老之詩莫賦而孝養之禮無從是  
用因子致崇從夫錫爵嗚呼父子亦既濟美宜大其家  
名器所以馭臣匪私於汝服予休渥保爾利貞可

妻劉氏封冀國夫人制

國家凡賚於臣工恩澤必加於伉儷蓋內有主饋之寄

則外盡事君之忠于以見夫婦之體齊而君臣之義大  
具官王桓妻劉氏相其夫子宜于室家春秋克敬於烝  
嘗夙夜諒多於儆戒用能保其祿位以不墜於箕裘宜  
錫脂田式昭婦道欽予休命對爾新封可

故金紫光祿大夫平章政事翰林學士承旨祕  
書監領崇福司事秦國公愛綏贈推誠協力  
贊治功臣太師開府儀同三司上柱國追封  
拂林王謚忠獻制

功大者位隆勞多者賞厚備國家之卹典必勛舊之良臣故具官某有服大僚克勤小物既宣力於憲廟復受知於世皇使於四方挺節窮荒之外列于庶位正色周行之間早已歷於機衡晚乃分於茅土太息九原之不作若為千載之可傳夫官莫隆於師而爵莫貴於王且號以表其勲而謚以著其行具此衆美可謂特恩豈惟旌爾之賢所以為後之勸嗚呼身沒而名不朽足慰平生邦舊而命維新益昌乃世英靈有濯寵渥其歆可

故妻沙喇氏追封拂林王夫人制

王封異姓特隆念舊之恩妻曰夫人盡俾從夫之爵故  
具官某故妻某氏位正乎內德協于中其夫歷事於累  
朝有子歲躋於膺仕盛大固由於世德訓戒亦本於閨  
門庸啓拂林之邦式慰焄蒿之感嗚呼死生契闊百兩  
之御百兩之將終始哀榮五鼎而養五鼎而祭歆予漏  
澤佑爾後人可

榮祿大夫知樞密院事穆呼哩封廣平王制

國非謂喬木必有勛勞之世臣爵莫貴封王宜畀子孫  
之賢者具官某乃祖先父累朝元功逮予纂承之初資  
爾翼助之力左右厥辟握掌武之樞機夙夜在公長周  
廬之禁衛是用超之五等昨以大邦嗚呼丕勞爾先故  
有生而富貴克篤前烈尚永保於忠貞明聽朕言對揚  
休命可

太保庫楚故祖父某追封祁連王制

昔在初載粵有蓋臣濟朕于艱難保朕于冲幼必乃祖

之攸訓至厥孫而始彰宜異其愍卹之恩以稱其積累  
之善具官某故祖父某忠厚為本勤儉為基德可致富  
貴而弗居謀可建功業而弗有故其施於後也大所以  
食其報也豐是用䟽西土而啟封超五等而錫爵皆推  
原其所自庸垂勸於方來嗚呼思克瘳之遭迴以有今  
日望祁連之峻極庸建爾邦魂兮如生歆茲成命可

故祖母某氏追封祁連王夫人制

論忠臣之功莫大於保其體求孝子之志莫先於顯其

親載疇爾庸遂及祖妣具官某故祖母某氏靜恭可則  
勤儉有常惟積善以深培本根宜再傳而致位台衮蔚  
為元老輔朕眇躬既加異姓之王宜命從夫之爵有光  
門閥式表國恩嗚呼魂魄故鄉想天山之不改蒸嘗禰  
廟諒翟第之如存不昧祇承式昌嗣續可

故父某追封祁連王制

惟國家之大臣應天地之昌運雖鍾河岳之秀實本祖  
父之賢具官某故父某簡質繼其前人忠信篤于後嗣

乃左乃右在朕有保翼之良惟艱惟勤於今為柱石之  
重欲報之德每念其先爰啓大邦起上公而命爵載疏  
美號詔太常而易名增閎閎之光華慰焄蒿之悽愴嗚  
呼父為師子為保既備哀榮君以禮臣以忠尚全終始  
英魂不爽漏澤惟歆可

故母某氏追封祁連王夫人制

母之鞠育其子正欲大其家聲君之寵綏其臣孰若尊  
其先世爰疏異數昭示至恩具官某故母某氏功見於



宜家德足以裕後篤生良輔以保朕躬翼衛於幼冲之時  
危從於艱危之際始終盡瘁夙夜在公遠追古之名臣蔚為  
今之元老推其積善之自錫以從夫之封稱王夫人建祁連國  
嗚呼非此母不生此子果若人言有其德必得其名時乃天道  
歆茲明命慰爾幽靈可

開府儀同三司上柱國江浙等處行中書省左丞相拜布哈故曾祖父某官達實端多卜贈服勤濟美功臣太保儀同三司追封居延王

謚安敬制

父傳之子萃忠孝於一門祖逮子孫備哀榮於三世具  
官某故曾祖父某官某志在功烈心無死生力戰則聞  
鼓而不聞金臨事則見義而不見利威稜懾乎群國武  
勇冠於三軍方太祖之在潛知歷數之有屬故見危而  
授命寧殺身以成仁共憐李廣之數奇尚想張巡之眈  
裂是以王加異姓國啓新封錫號以贊其忠易名以表  
其節嗚呼龍翔黑水昌期曾感於風雲蚓食黃泉漏澤

仍沾於雨露精神不爽休命惟歆可

曾祖母和斯德濟德呼氏追封居延王夫人制  
漏澤九泉莫厚於國家之典追榮三代惟施於宰輔之  
臣矧忠義之相傳由閨門之有度具官某故曾祖母某  
氏徽戒成於夫子教訓及於兒孫國爾忘家世載其美  
追原懿德盍啓新封嗚呼在昔艱虞厚報豈圖於今日  
致身富貴長守是在於後人苗裔相承昌熾未艾可

故祖父達爾罕托恰勒贈推誠保德功臣太傅

開府儀同三司上柱國追封居延王謚莊敏

制

事君致身人臣之大節封王列土國家之異恩既忠於前宜榮於後具官某故祖父某驅馳百戰終始一心雖身沒而名存況父忠而子孝亦天啓於昌運故世產其英賢將軍豈惡於生恐傷於義壯士既得其死甘喪其元此汝所以存心於理宜其有後是用誕頒爵號以答勛庸昭乃辟之弗忘俾爾孫之有勸嗚呼聞鼓鼙而思

將帥如見平生指帶礪而誓河山庶幾不朽精神如在  
恩渥其歆可

祖母額森諾耶蘇德呼氏追封居延王夫人制  
君臣以義合故有死事之臣夫婦以德從必獲稱家之  
婦克魚是美宜享其榮具官某故祖母某氏淑慎其儀  
柔嘉維則若夫若子繼沒於三軍為母為妻獨守於一  
節是用乃孫之貴載加大國之封嗚呼如山如河緬想  
克宜於象服于疆于理尚惟永昨於脂田昭爾幽靈歆

予休命可

故父贈揚武守正功臣太保儀同三司追封延  
國公謚忠節布哈穆爾加贈揚武守正定遠功  
臣太師開府儀同三司上柱國追封居延王  
仍謚忠節制

朕思良將為有死之將軍世選爾勞惟象賢之濟美錄  
功惟重頒爵故超具官某故父贈某官某業紹祖宗才  
兼文武杖節邊陲之外甫脫命於繫囚息肩卿監之中

復聞謀而上變大建征西之府以為逐北之圖彼乃懼而詐降爾竟歸而遇害惟天福善生子世家雖已錫之山川宜益尊其名號以勵後世以慰當年嗚呼馬革裹屍獨殺身而報國虎頭食肉終啓土以封王爾魄如生朕命維允可

故母阿爾台呼塔噶氏追封居延王夫人制

盡忠為臣既封王而列土正家有婦宜錫爵以從夫具官某故母某氏妻道可書母儀可則其夫死事力求屍

於莽中負骨來歸上祈哀於闕下鞠躬盡瘁守節持家  
釁然母子之依致此公台之貴緬懷賢範益厚徽章嗚  
呼副筭六珈尚想宜家而宜室萬鍾五鼎庶幾事死如  
事生佑爾後人歆予寵命可

故母托里氏追封居延王夫人制

婉賢伉儷既克稱於名家厚本浚源乃篤生於良輔慨  
違至養庸畀卹章具官某故母某氏幽閒之姿貞順之  
行內而正其閨閫外則和於族婣生備嘗於艱難沒宜



躋于祭祀是用改從王爵封以居延下齊夫子於玄臺  
上配爾姑於禰廟嗚呼母之愛其子咸願致於公台朕  
以廣其恩故特隆於命數其歆景命允迪後人可

妻布雅木齊氏封延國夫人制

惟國家推恩而命爵於夫婦齊體而抗尊彰厥有常達  
于庶位具官某妻某氏生於盛大之族嬪于忠孝之門  
貞靜純和既克勤于中饋儆戒畏慎諒多贊于夫君宜  
加湯沐之封以為伉儷之重益勉婦道用相爾家可

御史大夫巴圖母某氏封泰安王太夫人制

官德懋者莫大於親榮濟世美者實原於母訓誕敷命  
數光賁庭闈具官某母某氏蚤以名家嬪于華胄事尊  
章而盡禮處嫺族而可儀夫克成其大勲助由中饋子  
能繼其先志教有義方宜疏泰岳之封庸正小君之位  
嗚呼三牲五鼎養喜逮於親年副笄六珈貴盍齊於王  
者其承景命永介壽祺可

銀青榮祿大夫安南國王遥授湖廣等處行中

書省平章政事陳益稷加金紫光祿大夫餘  
如故制

委質歸朝既去逆而効順以爵馭貴宜崇德而報功誕  
播明綸用孚衆聽具官陳某知畏天者事大期保境以  
全民慕帝王之有真見幾而作懼祖宗之不祀自援而  
來以忠孝之誠受知於世皇蒙天地之恩嗣封於故國  
始者周王之赫怒伐罪弔民終焉舜帝之誕敷班師振  
旅彼迷不復爾守彌堅拯溺救焚從王師凡一再舉適

館授槃留湖右幾三十年身歷事於四朝志不渝於初  
節肆朕踐阼亟其來朝是用增新秩以示恩仍舊封而  
授職嗚呼內寧外撫朕不忘銅柱之南近悅遠來爾益  
拱辰星之北祇若休命永肩一心可

仰山慧慈靈感昭應大通禪師加封慧慈靈感  
昭應大通正覺禪師制

佛法本空實慈仁而利物神道設教大變化以無方某  
山某禪師自唐會昌以來有小釋迦之號因緣出現知

幾劫之修來願力宏深致二神之獻宅大哉德施之普  
歸然江水之西爰即舊封肆加美謚嗚呼求神通索妙  
用未嘗有為畏天命閔人窮是乃正覺陰翊王度永鎮  
名山可

仰山顯德仁聖忠佑靈濟王加封顯德仁聖忠  
佑靈濟廣慶王福德聖仁忠衛康濟王加封  
福德聖仁忠衛康濟順慶王制

山川出雲為雨者是名曰神功烈在民則祀之乃古之

制有嘉靈跡爰錫贊書某山某王能自得師聿來胥宇  
乘蜿蜒扶輿之氣為聰明正直之神水旱疾疫之不常  
遇哉輒禱伯仲墳簏之相應如響隨聲茲既達於予聞  
其並增於美號嗚呼為民請命故致力於山靈明德惟  
馨繼自今其世享祭則如在感而遂通可

太保庫楚妻旺扎勒台氏封應國夫人制

朕聞家人正而天下定鵲巢應而王道成蓋國之本在  
家而女正位乎內有嘉賢淑作儷元臣具官某妻某氏

生后族之中服女師之訓配其爵位宜而室家是用貴  
因其夫榮開大國肆誕數於明命其祗服於訓詞於戲  
邦君之妻曰夫人乃古之制婦人以義勸君子惟汝  
之賢欽念寵嘉益勤敬戒可

御史大夫伯都母王氏封泰安王太夫人制

國之名臣必有內助之美家之孝子必有母訓之嚴自  
昔予聞于今乃見具官某母王氏貞靜表于閨閭慈儉  
儀于族嫻方良人任社稷之勞必勸以義及有子任耳

目之寄克教以忠勛庸備載於鼎彛命數猶稽於象服  
爰錫從夫之爵以慰愛親之心於戲被山帶河雖君子  
之不待前周後魯於賢嗣以攸觀永篤忠貞以介眉壽  
可

通奉大夫侍御史趙世延故祖父蒙古漢軍征  
行大元帥按扎爾贈推忠勛庸功臣太保儀  
同三司上柱國追封秦國公諡武宣制

應天順人惟祖宗之仁聖建邦啓土亦將帥之勤勞睠



比盈成申之褒贈具官趙某故祖父某官某才兼文武  
德備忠良挺不世之姿佐方興之運率師滅夏莫不望  
風而降假道破金咸謂自天而下以帝王之兵不殺為  
本故秦蜀之衆長驅而平遂收百戰之功迥出諸將之  
右慕興唐之英衛老不辭難方佐漢之良平謀無遺策  
九京不作千載如生是用進位台衡表勛柱石冠四字  
以錫號節二惠而易名榮開白社之封載在丹書之府  
嗚呼望三千之組練古名將何以加渺百二之山河爾

嗣孫其是似尚維英爽歆此寵嘉可

故祖母白氏追封秦國夫人制

夫將帥之後有清白之名必閭閻之間有勤儉之教具  
官趙某故祖母白氏出於令族配我良臣起從諸王歷  
事五帝南征北伐當建業之難內撫外攘受總戎之寄  
賞則均於士伍功必讓於偏裨惟爾謹身節用以正乎  
家勞心焦思以淑于後施于孫子允稱執法之中在我  
國家宜贈從夫之爵以正位號以極哀榮嗚呼生將門

歸將門獨秉詩書之訓始婦道終婦道是膺象服之宜  
魂而有知歆予景命可

故太傅錄軍國重事錄太醫院事依前開府儀  
同三司宣徽院使領大司農司事特爾格贈推  
誠佐理翊戴功臣太師開府儀同三司上柱  
國追封秦國公謚忠穆制

豐水有芑儲材式遺於子孫南山得賢圖任正資於耆  
舊遽亡一鑑孰作九京故具官某喬木世臣高山景行

推前人未究之志廣太上好生之仁全活知幾百人出  
入將五十載貳公宏化為商鼎之鹽梅事君致身作周  
邦之屏翰弼亮四世終始一心生雖極於顯庸沒盡伸  
於卹典是用胙之大國躋以上公錫號而表勛易名而  
閒府於戲載瞻西土永懷德義之言啓迪後人益贊邦  
家之固英魂不爽寵命其承可

故妻輝和爾通郭囉氏追封秦國夫人制

慎終追遠本益繫於家人崇德報功恩式隆於卹典故

具官某故妻某氏毓芳名族作儷元臣約婚爰自於初  
年歷夫艱阻歸國竟尋於舊好宜其室家事姑備孝養  
之隆教子熟義方之訓緬懷賢範加厚徽章雖文駟雕  
軒生未正小君之號然驚誥象服沒猶荒大國之封尚  
克歆承式昌嗣續可

故妻冉氏追封秦國夫人制

朕聞生榮死哀禮無先於爵賞男外女內義莫重於人  
倫所以錄既沒之勛庸推而及平生之閨閭故具官某

故妻冉氏慈孝而恭儉貞靜而淑和作配世臣號稱賢婦昨既開於大國封可後於從夫於戲副笄六珈豈異當年之榮耀山河百二尚貽後嗣之昌隆咨爾幽靈服我休命可

妻張氏封秦國夫人制

咨爾故具官某妻張氏婦人從夫爵者也爾夫以四朝元老為我近臣九京不可作矣用開大國以封之躋上公以贈之惟爾盡婦道以正家篤義方而教子肆頒異

數以慰爾死生契濶之思其益敬恭永對光寵可

某官布拉吉達封河南王制

撫帝業之艱難爰忠將帥啓功臣之盟誓宜及子孫咨  
爾在廷聽予作誥具官某知明識遠心廣體胖勛名克  
篤於前人藩翰久勤於外服昔將平於內難朕大投艱  
方深計於中途卿獨決進志存弼亮身佩安危所謂社  
稷之臣盍享尊榮之報迺復煩於機務非示寵於忠良  
是用命汝襲諸侯王以長守於富貴歸丞相印以自養

於壽齡既不遠於京師可以時而朝覲允資重望坐鎮一方於戲表河之南念爾乃祖乃父為國之屏敬哉有土有民永建厥家毋棄朕命可

光祿大夫同知徽政院事趙國公常布呼齊故曾祖父資贈効順功臣太保金紫光祿大夫上柱國追封趙國公謚安穆制

朕惟德盛位隆勞多賞厚故爵有五等之制恩有三世之推豈朕所私乃國之典具官常某故曾祖父某鍾河



岳之氣逢祖宗之時助玉食之調和佐瑤圖之開闢出  
參輦轂入侍禁闈惟夙夜不懈於忠勤致孫曾益躋於  
顯盛是用詔太常而定謚命中書以授官以賁九原以  
勸百辟於戲表恒山而賜履惟爾之賢建上公以錫名  
亦榮之至尚迪爾後母忝世臣可

故曾祖母侯氏追封趙國夫人制

掌先朝九重之養厥有內臣啓名家累世之昌必資賢  
配允為餘慶宜渙異恩具官常某故曾祖母侯氏惟儉

惟勤克淑克慎至曾孫而建土皆積善之降祥是用正位小君儼封全趙於戲魚軒翟茀已無及於當年礪山帶河尚永存於奕葉眷惟幽爽不昧欽承可

故祖父烏爾圖贈推忠守義功臣太傅儀同三司上柱國追封趙國公謚恭敏制

一善必錄聖哲所以得人五世具昌忠良故宜有後風雲不改茅土方新具官常某故祖父某大節傳家小心事主負羈絏而從巡狩知無不為和鼎鼐以輔經營死

而後已迄啓孫曾之慶聿開闕閱之華載錫公封俾從  
禰祀於戲洗而揚觶豈無杜蕢之正言書以汗青不遇  
董狐之良史朕方慨想爾尚顧歆可

故祖母孟氏追封趙國夫人制

洪惟我祖建官必得其人粵若汝家得君最親於衆何  
愛從夫之爵以副尊祖之心具官常某故祖母孟氏德  
婉臣工禮明閨閭上致舅姑之養下教子孫之忠宜啓  
世封式綿家慶於戲母儀婦道早稱德耀之賢象服脂

田永顧邯鄲之胙服予休命相爾後人可

故父資善大夫同知宣徽院事約爾珠贈推誠宣  
力保德功臣太師開府儀同三司上柱國追  
封信都王謚忠懿制

祖宗創業時非一手足之為家國同休古有萬子孫之  
祝矧惟邇列豈是世臣爰推漏澤之恩以慰在廷之彥  
其官常其故父某官某致身得地稟性自天方當就傅  
之年已識事親之禮近耿光於世祖承明眷於裕皇由

鼎俎以造邦小試阿衡之事業指鹽梅而喻相諒多啓  
沃之謀猷迨予訪落之初念爾老成之遠克昌後嗣益  
茂前聞是用躋異姓之王封視多儀於公府表駿功而  
作號錫美謚以易名少極哀榮用光幽顯於戲周家五  
等列爵顧茲命數之已超金氏七葉侍中尚衍聲名於  
不朽肆惟英爽不昧歛承可

母馬氏封信都王太夫人制

昨之民社固追念於世勞相其階庭又不貽於母訓盍

疏湯沐以貢晨昏具官常某母馬氏有內則之修勤得  
老氏之慈儉周旋中禁閨門儆戒以相成燕坐北堂簪  
笏怡愉而就養由國命婦陞王夫人於戲從夫爵而爵  
既崇保家聲而聲益振受茲祉福宜爾子孫可

妻徐氏封趙國夫人制

小君之稱所以正位乎內從夫之爵所以勸功于朝宜  
畀恩言俾榮志養具官常某妻徐氏居然令德所謂家  
由婦興嬪于世臣豈特母以子貴何愛魚軒之寵以成

卷四  
翟弟之華夫豈眷私益彰孝治於戲怡愉鶴髮無以夫  
人而自安敬戒雞鳴庶幾君子之偕老可

加賜普庵禪師塔名制

朕聞佛氏以空寂為宗則凡學其道者寧欲建名號殊  
稱謂以示天下後世哉而國家非此無以昭尊德樂道  
之意也朕自即位以來聞袁州大慈化寺普菴寂感妙  
濟真覺昭眡大德慧慶禪師印肅紹臨濟之緒超華嚴  
之境德映當代澤被方來其道甚尊顯心切慕之既累

錫大謚惟塔號未稱可加賜定光之塔曰定光靈瑞之  
塔主者施行

表牋致語

天壽節中書省賀表

大德丙午

誕開熙運合九五以毓乎聖神丕衍鴻圖撫億兆而膺  
乎壽富欣逢華旦喜溢中秋

中賀

欽惟皇帝陛下大德

體元立功致泰無為而治猶勤典禮之修不令而行益  
廣恩言之布當千齡之慶會得萬國之懽心臣等幸列



台衡光依宸極河清海晏龍飛常御於中天星拱雲從  
虎拜敢先於率土

翰林院陞從一品謝表

天開文運治載睹於熙朝地切禁林恩比崇於極品具  
僚胥慶斯道增華

中謝

欽惟皇帝陛下德與日新聖由

天縱遇儒臣而特異相古所無進院秩以示優自今而  
始親授銀章之重益為玉署之榮臣等學愧前修位隆  
往代典謨訓誥敢忘黼黻之勤元首股肱願効賡歌之

盛

進三朝實錄表

皇慶元年十月九日

一人御極聿嚴金匱之藏三后在天實監玉堂之紀粵  
若稽古克底成書

中謝

欽惟皇帝陛下孝友慈仁溫文

睿哲統之垂業之初今昔繼承功以著德以彰在茲纂  
錄首崇筆削之任式宏龜鑑之圖臣等職忝禁林才非  
良史繫年繫月豈足盡於先朝作典作謨庶有徵於今  
日

興聖宮元旦中書省賀表

正月始和禮聿嚴於元會聖人教愛養莫大於尊親宇  
宙維新臣民均慶

中賀

欽惟皇太后陛下身為內則德

婉周南興明聖於兩朝皇圖益衍昭慈仁於四海帝治  
彌昌是宜宮壺之基克底邦家之盛臣等職慚百揆忠  
守一心地久天長願岡陵之齊壽風和日麗普覆載以  
常春

中宮元旦中書省賀牋

三陽肇序彰泰道之方亨萬物皆春表坤元之厚載歡

騰海宇喜溢宮庭

中賀

敬惟皇后殿下寬裕有容柔嘉

維則功密孚於宗社德允稱於禕綸輔贊皇猷廣二南  
之風教昌延聖祚茂百世之本支聿增彤史之光式衍  
椒房之慶臣等幸逢盛旦忝備台司仰日月之儷明誕  
昭內治在璣衡而齊政永紀長年

文廟落成祝聖致語

伏以建國君民學為先務歸美報上頌必有祈方追蹤

三代之宏規敢推本一人之大德欽惟皇帝陛下承天  
御極繼聖受圖虞夏商周所弗臣悉同文軌風雨霜露  
無非教威被聲光肇卜上庠首營新廟宮牆翼翼聿來  
學禮之徒俎豆振振共蘊祝堯之志臣等夙叨化育幸  
際平成爰酌禮於古今庸致嚴於朔望思皇多士於樂  
辟雍作之君作之師首善繫四方之本教以忠教以孝  
感恩同萬歲之呼

雪樓集卷四

欽定四庫全書

集部

雪樓集卷五

六

詳校官中書

臣

羅錦森

侍讀臣孫球覆勘

總校官庶吉士

臣

朱

鈐

校對官編修

臣

楊壽楠

謄錄監生

臣

鄒貽詩

欽定四庫全書

雪樓集卷五

元 程文海 撰

玉堂類藁

勅賜碑

平雲南碑

國家繼天立極日月所照罔有內外雲南秦漢郡縣也  
負險弗度乃憲廟踐阼之二年歲在壬子我世祖聖德  
神功文武皇帝以介弟親王之重授鉞專征秋九月出

師冬十二月濟河明年春歷鹽夏四月出蕭關駐六盤八月絕洮踰吐蕃分軍為三道禁殺掠焚廬舍先遣使大理招之道阻而還十月過大渡河上率勁騎由中道先進十一月渡瀘所過望風款附再使招之至其國遇害十二月傅其都城城倚點蒼山西洱河為固國王段興智及其柄臣高泰祥背城出戰大敗又使招之三返弗聽下令攻之東西道兵亦至乃登點蒼臨視城中城中宵潰興智奔善闡追及泰祥於姚州俘斬以徇分



兵略地所向皆下惟善闡未附明年春留大將烏蘭哈達經略之上振旅而還未幾援善闡得興智以獻釋不殺進軍平烏蠻部落三十七攻交趾破其都收特磨谿洞三十六金齒白衣羅鬼緬中諸蠻相繼納款雲南平列為郡縣凡總府三十七散府八州六十縣五十甸部寨六十一見戶百二十八萬七千七百五十三分隸諸道立行中書省於中慶以統之大德八年平章政事伊蘇岱爾建言所領雲南地居徼外歷世所不能臣先皇

帝天戈一麾悉歸王化今其民衣被皇朝同於方夏  
幼長少老怡怡熙熙皆自忘其往陋非神武不殺之恩  
不及此惟黠蒼之山嘗駐蹕焉若紀聖功刻石其上使  
臣民永永瞻仰於事為宜中書以聞制曰可以命詞臣  
臣某再拜稽首而言曰世祖皇帝之德大矣譬如天地  
之無不持載無不覆幬而生生之意恒寓於雪霜風雨  
寒暑變化之中物之蒙者薰然而溫灑然而濯翕然  
而同靡然而順有不自知其然而然者故其功烈之崇

基業之廣貫三靈而軼千古夫以大理之昏迷旅拒虐  
我使人若奮其武怒俾無遺育可也而招徠綏緝終釋  
其主弗誅嗚呼微天地之德孰能與於此乎今陛下建  
中和之政凡以繩祖武厚民生無所不用其極中外欽  
承無違弗届是以藩方大臣於錢穀甲兵之外惓惓以  
光昭令德為請其知為政之本也已漢世宗從事西南  
夷天下為之騷動蜀民咨怨喻之諄諄鑿池泣習再駕  
而後取之其視今也孰愈穆王周行富縣必皆有車轍

馬跡焉初非疆理天下也而世猶誦之至今其視跋履  
山川灑濯其民而納於禮義之域孰多彼碧雞金馬與  
夫點蒼皆其山之望者也漢使祭之唐季盟之夫各有  
所畏焉耳今也鷁未始磨之崖紀無能名之績桓桓燧  
燧與世無極豈惟足以震百蠻榮千古其餘光所被山  
川鬼神與嘉賴之嗚呼盛矣哉臣事先皇帝早受眷知  
今復待罪禁林發揚蹈厲職也不敢以荒落辭謹再拜  
稽首而系之詩曰

於皇維元載地統天大噫小噓曰寒以暄粵西南陬水  
駛山嶺風霆流形氣交神州跂息蠕蠕勾萌鮮鮮谷飲  
巢居燕及跼鵠繫誰之恩聖祖神孫武烈文謨湔祓生  
存既有典常被之服章我吏我民我工我商萬國一家  
孰為要荒黜蒼蒼禹跡堯牆井鉞參旗終夜有光威  
不違顏作善降祥嗟爾耄倪視此勿忘

拂林忠獻王神道碑

皇慶元年春天子若曰我太祖皇帝肇受天命太宗憲

宗惟艱惟勤逮世祖奄有萬方子孫承承底于朕躬元  
功大臣宣力載勞褒崇弗稱朕甚憫焉於是制贈故金  
紫光祿大夫奉國公愛綏推誠協力贊治功臣太師開  
府儀同三司上柱國追封拂林王謚忠獻詔臣某撰文  
刻碑墓道顯休之謹按公西域拂林人祖巴阿喇父博  
囉穆蘇公剛明忠信能自致身立節於西域諸國語星  
歷醫藥無不研習有列邊阿達者以本俗教法受知定  
宗薦其賢召侍左右直言敢諫為世祖所器中統壬戌

春詔都城二月八日大建佛事臨通衢結五采流蘇樓  
觀集教坊百伎以法駕迎導公進言曰方今高麗新附  
李壇復叛淮海之孺刁斗達旦天下疲弊瘡痍未瘳糜  
此無益之費非所以為社稷計也上嘉納之是月望上  
幸長春宮欲因留宿公趣入諫曰國家調度方急兵困  
民罷陛下能安此乎上方食愕然盡以賜公拊其背曰  
非卿不聞斯言促駕還自是日見親近公亦無所隱至  
元戊辰春大蒐于保定之新安日且久公於上前語供

給之民曰得無妨爾耕乎上即日罷從幸上都新涼亭  
成大宴諸王百官競起行酒公進曰此可飲乎上悟抱  
公膝上啐其頂左手挽公髻飲以酒顧謂皇太子曰有  
臣如此朕何憂焉癸未夏四月擇可使西北諸王所者  
以公嘗數使絕域介丞相博囉以行還遇亂使介相失  
公冒矢石出死地兩歲始達京師以阿魯輝吾所贈寶  
裝束帶進見令陳往復狀上大悅顧廷臣嘆曰博囉生  
吾土食吾祿而安於彼愛綏生於彼家於彼而忠於我



相去何遠耶拜平章政事固辭初上登萬歲山瞻望四郊惻然累累欲遷之及將盡徙南城居民實大都皆弗果賜宿衛士廬舍禁殺胎夭廢置西域星歷醫藥之署立廣惠司給在京疲癯殘疾窮而無告者皆以公言罷行之成宗即位眷益隆賜腰輿出入大德癸卯上弗豫政出闈闥秋八月京師地震中宮召謂公曰卿知天象此非下民所致然耶公對曰天地示警戒耳民何與願熟慮之曰卿早何不言公曰臣奏事世祖及皇帝雖寢

食未嘗不召見今曠月日不得一入侍言何由達數年之間災異日起公力陳弭變之道辭多激切弗納丁未上棄臣民公時在祕府有祕文非御覽不啓中使奉內旨迫取公厲色拒之今上皇帝奉皇太后至自懷州悉誅奸黨迎立武宗以公為忠爵賞特異方倚柄用至大改元六月癸卯薨于上都之私第年八十二三宮悼惜不已贈賻有加某年月日葬某所公起家為定宗近侍中統間掌西域星歷醫藥二司事至元戊辰兼廣惠司

丁亥拜秘書監己丑領崇福使甲午加翰林學士承旨  
兼修國史大德丁酉選授平章政事丁未封秦國公積  
階至金紫光祿大夫今而有是命前後以功以言被賞  
賚及卒葬賜贈黃金為兩者四百有奇白金七百有五  
十楮幣十五萬水晶金玉器珠衣帽寶帶錦衣白馬不  
可勝計六男四婿三孫皆為大官近侍長男額哩葉光  
祿大夫秦國公崇福使領司天臺事次塔爾哈翰林學士  
承旨資善大夫兼修國史次哈斯光祿卿次克呼濟蘇

太中大夫同知泉府院事次老哈昭信校尉提舉廣惠司事次約尼宿衛興聖宮長壻榮祿大夫宣徽中政使訥古德勒次中順大夫同知崇福司事蘇爾坦次資德大夫章佩院使烏呼納次更直禁衛士赫赫長孫布格次蒐克次安圖皆直禁衛盛矣竊謂古之有天下者皆以得人為基我朝以神武仁恕定四海群方萬國忠良亮直雄偉傑雋之士莫不都俞廟堂之上歷數世而彌光若公者得輸肝瀝膽致位丞弼自公而王載美太史

垂榮子孫稱社稷之臣豈偶然哉銘曰

於戲皇元赫赫巍巍聖祖神宗超姚夷羲東集扶木西  
臻虞池嚴嚴在廷文凝武思我有爭臣拂林之衣衣義  
飫仁載公轢私佐定翼憲世皇是儀靡言罔從靡德弗  
施我車爾輔我舟爾維惟公之來廢寢忘飢惟公之言  
董茶如飴杖節遐徵信威四陲朝霜茫茫夕雪霏霏既  
復而往復往而歸蒙強突勁睨險如陟彼留而安寧歸  
而危皇華以遣出車勞之大德之末蕭牆禍基牝雞晨

雖猩猩夜啼圓儀示儆方載陳規弗悟弗悛竊弄潛窺  
在朝惟公蹇蹇不移我皇赫怒草刈榛夷大業載安天  
平地熙惟公始終不詭不隨漢軼武騫唐擬徵珪何以  
賚之寶帶珠衣何以貴之大冕桓圭黼黻拂綬封爾  
提惟君之聖惟賢之知欽于世世視此貞碑

趙氏先廟碑

先王之制諸侯廟五大夫廟三父為士子為大夫葬以  
士祭以大夫禮也是以君子將營宮室宗廟為先祭器

為次居室為後而宗廟之器苟可銘著者無不著焉所以慶所以勸也忠孝之道備矣今天子稽古右文一本於禮河洛之思羹牆之見慨然延念先正之臣克左右亂四方其股肱心膂之績固以彰于彛常煥乎其足徵矣乃若國家所以報往而勸來者猶以為未底極也爰命公卿舉先猷展故實而隧章之典行焉於是陝西行御史臺以永古特氏父子勲伐列上公車有旨集博士禮官議議既上詔故征行大元帥按扎爾為推忠佐運功

臣太保儀同三司上柱國追封秦國公謚武宣配白氏  
秦國夫人故蒙古漢軍都元帥國寶為推誠佐理功臣  
光祿大夫平章政事柱國追封梁國公謚忠定配雲氏  
梁國夫人明年公孫世延入叅大政政以咸熙天子嘉  
焉又贈其曾祖故群牧使達袞彰義保節功臣資德大  
夫御史中丞上護軍追封雲中郡公謚貞毅配鄂喇琨  
氏雲中郡夫人繇是叅政之先三世六人皆蒙加恩又  
明年叅政拜中丞自中丞遷右轄分治雲南天子顧中



丞非君不可復拜中丞以乃祖乃父勤勞皇家宜撮其平生著之闕祀庶幾永啓厥後爰詔臣某文其家廟麗牲之石臣惟上之下下邛隆者恩也大復古始者禮也感激奉詔謹按永古特氏雲中世族武宣公幼孤育於外氏曰卓裕勒嘉因姓舅姓轉而為趙宣武智略沈雄弓馬絕世未冠材器已顯攻城略地所向無前扈太祖平河湟從太宗下岐鳳馘強俊取平涼慶原邠涇如風墮籜金源固守關河幾二十載一旦武宣假道擣虛如天墜

而地湧良平之智不及施賁育之勇無所用心潰膽裂  
莫之能支睿宗深所嘉賞金源繇之遂墟已而奉律西  
征隴右遙定進兵蜀道首奪階文守漢陽制三邊納吐  
蕃收後効成都夔門之戰江油張掖之師皆其功之較  
然者多謀尚義厚下恤民所至捄殄戮贖俘囚輯降附  
則所惠蓋廣矣然則開國之功不後諸將而略不蒲假  
退然若無所謂勞謙君子者歟忠定雖出將家自幼學  
問雍容閑雅言貌甚都蓋武宣雖積苦兵間而敬禮儒

生恒戒軍中無毀文籍是宜有佳子弟之報慷慨倜儻  
能得人之懽心勇於當敵愛恤士卒有古名將之風焉  
重慶刪丹之戰皆居軍鋒或降或殲無不如志火都受  
首策之彌精思立奇功以承先志乃招屬戶修廢州虎  
視西南別授元戎之寄於是徼外羌渠畏威款塞列於  
王會初不自以為功降羌爵命反出其上殷勤遜謝益  
簡帝心君子有終世濟其美古之名將有不能及者矣  
竊嘗究觀成功之臣弗居者百一而矜以致敗者何多

也若武宣忠定為而弗有有而弗恃簪組蟬聯式克至于今日父子祖孫並受顯服昨之秦梁躋之廟祔將遂為百世不遷之祖非盛德孰克登茲嘗聞雲中据西北河山之與原野高博風氣凝厚炳靈異而生其間者不出則已出則必瑰偉絕世之材若永古特氏之達已數世而方來者彌昌其不謂之間氣之鍾歟且家奮於韜鈴而中丞服膺詩書動必以禮高材矯節負天下重望尊天子之命考先王之禮於報本返始教孝移忠之義益

惓惓也詩不云乎以似以續續古之人斯可謂能似續者矣揆厥淵委宜有雄詞發揚蹈厲老臣何能然大君有命謹擬其大者而系之銘銘曰

皇帝御寓天蓋地函萬有咸宅施仁錫類幽遐聞通恩明在上矧茲世勞崇功廣業禮有攸當永古特氏方叔召虎父子相望揚休續慶光于邦家以將以相桓圭玄衮爾祖其從同尊與享馨香惟德子孝臣忠世世无曠刻此貞石以昭淵猷以迪永養

應昌路報恩寺碑

城應昌之四十有一年上即皇帝位制公主星格喇實  
封皇姊大長公主子阿爾嘉世立嗣封魯王命下之日  
主謂王曰應昌有土肇自太祖皇帝成於世祖裕皇而  
順宗皇帝今儀天興聖慈仁昭懿壽元皇太后實已所  
自出上篤親睦之誼承成宗武宗博叙之志以有今日  
欲報之德惟佛焉依至大二年嘗規建佛寺于宮之東  
曰報恩盍竭力成之既成請文勒碑昭示無極上以命

詞臣臣某謹按太祖初興魯國忠武王阿齊諾延以佐  
命元勲有分地約世婚而昭賡順聖皇后歸于我世祖  
太祖之孫色徹肯公主下嫁王子納沁至元八年始置應  
昌府以封其子特穆爾尚帝季女囊嘉特章公主未幾  
陞府為路十四年特穆爾北征有大勲賜號阿勒達爾  
圖諾延元貞元年封濟寧王主為皇姑大長公主子敦布  
拉尚星格喇實公主乃今皇太后之中子也大德十一  
年武宗即位封皇妹大長公主敦布拉魯王逮今嗣王

祖孫凡五世國益大爵益貴恩數益異為之傳以輔之  
為之群有司以治之於是鴻吉哩氏雖古塗山有娥不  
足擬隆寺之建所以歸美報上昭忠孝也殿堂廡門庖  
寮庫庾度經之室棲碑之亭金碧焜華芬橈宏密繚以  
周垣亘以修塗一木一石必出乎已一夫一役不煩乎  
民簡僧之有行業者曰智以主之日帥其徒誦演祝讚  
梵唄洋溢諸佛降監祖考來格帝室王家福祿攸同謂  
之報恩不亦宜乎洪惟聖祖神孫覆斯天載斯地廣大



慈仁與佛一德皇姊嗣王克永孝思克廣德心以崇佛  
乘宜聖上親親之道彌至而臣子報稱之誠無數贊皇  
圖於億載保王國以匹休猗與盛哉臣某謹拜手稽首  
而獻頌曰

在昔太祖龍興朔方惟鴻吉哩忠武泱泱佐定中原遂  
開大荒約締世婚申錫土疆實生昭膚相我世皇光天  
之下德盛仁強應昌既邦魯國是王貳館繼承奕葉重  
芳連城列邑沃野相望設官分職乃紀乃綱婉婉皇姊

愛積厥躬帝弟帝兄承于祖宗洎我聖母澤濟恩隆何  
以報之佛法是崇乃集群材乃徵六工于城之中于宮  
之東爰作爰謀爰蔽我衷以奠覺皇以展孝恭飛殿巍  
巍列屋周阿丹題藻掄電轉星羅彤雲承雷翠霧凝柯  
天花夕雨貝葉晨哦慧日曬光祥風扇和寒松沃色碧  
海澄波永底佛慈百祿是荷磐石其宗礪山帶河聖母  
萬年帝壽且多佛法廣運皇道無頗

魏國趙氏先德之碑

夫立德制行外有以孚于人内有以孚于家善亦審矣  
若其晦顯則係乎時焉而非為善者之所急也金源氏  
之末有趙令宰元城吏民愛之既沒相與封樹其墳至  
今謂之縣冢此可謂善孚于人者矣令之冢婦曰袁寇  
至攜二兒逃于鄰穴不納則棄已所生者於草抱前室  
子以免明日寇退草中兒亦無他衆義而賢之此可謂  
善孚于家者矣其孫為御史使東南還過潤適秋濤大  
溢冒田廬毀城郭失亡甚衆存者無所得食輒以便宜

發官粟以賑全活無算其後乘貳車廩訪浙部又值饑疫躬歷民廬勸分所活如上然則好善其家法耶先是朝廷興舉卹典以勸臣鄰視厥子孫之秩追命其先有差乃延祐二年冬御史臺言曰侍御史趙簡自始通籍以迄于今宣猷多矣其家贈封之恩敢請循令甲制曰可贈大父琛資善大夫大司農卿上護軍追封魏郡公謚安僖父揖榮祿大夫大司徒柱國追封魏國公謚敬惠大母袁母李皆追封魏國夫人明年春再以表墓為

請有旨命臣某文之于碑謹按趙氏魏人曾大父藻元  
城令大父琛潛德韜輝七十二乃終娶于李生汴而卒  
再娶于袁生楫即草中棄者也袁有志操勤以裕貧儉  
以養節衣食必先汴而後楫既長則遣楫媚於李而為  
汴娶董氏焉汴亦終不仕以養曰進曰德其子也又皆  
賢楫雖出居然不忘其親事之極孝趨義尚交儔儻自  
意中統初宣撫張公某材而辟之辭不許則願下就工  
官以便定省張公益賢之後遷承事郎織染司提舉善

於其職嘗輸幣于官府獨以精良受美錦之賞以老上  
印綬去陳書樂賓不復與世事張夢符書其堂曰餘慶  
李受益為之記盧處道為之銘名士數十人皆歌詩以  
屬之大德癸卯正月十三日卒得七十有四年李慕用  
君姑之德順而貞睦而肅以服飾易書教子故皆有成  
後夫四年卒得七十有四年子男四曰簡中大夫侍御  
史曰亨襄陽三司大使曰潤山東宣慰司照磨曰循雜  
造織染提舉皆能官有譽簡端深闇亮服膺詩書向自

淵部入為刑部侍郎遷南臺治書河東憲拜治書侍御史  
叅議中書河南叅政晉居臺端建白宜開經筵講聞  
治道及選耆儒訓迪宮邸上嘉其忠賜貂裘犀帶至是  
又有今命父子祖孫逮于閨門咸食善報所謂降之百  
祥者歟書云臯陶邁種德夫臯陶亦豈若農圃然日夜  
眷眷遲其所殖之孽茂且實而享有其利哉世或不察  
而以種德自名持陋而望奢尅期延佇小有不遂則已  
固疑而怠衆亦且笑而議之矣夫以一婦人當危急存

亡之時身且不保何暇他有所計特其真誠恤孤保抱鞠育同於所生及顛沛造次之頃能不失其本心耳又豈知今日之報乎惟趙氏之善發於元城濬於魏郡而澄涵於敏惠然非有為而為之是故充於中而弗外見必有後嗣若此然後大禔君子曰幸哉不然為善者何恃臣既奉詔叙次為之三嘆申以銘詩曰

太上貴德肫肫其誠道既隱只有實有聲抑又散譌課功責羸或舛以對或愜而馮是以在昔戒毋近名顯允茂宰



維魏之華嗣有明哲實昌厥家夫出婦居衆奔以譁曰寇  
至矣績捐其麻左抱右提變變呱呱蒼黃怔營二母二嬰誕  
棄其一豈獨寡情顧此失恃我所素矜棄彼在我此棄  
孰生天兩全之載歸載寧自茲繩繩時乃天道我初何  
心人謂其報司徒司農崇封顯號湯沐大名配食祖考  
懿彼淑人維神所勞天道無親恒與善人天何言哉委  
于大君允爾趙氏第祿用新言與其善言昭其厘咨爾  
雲來爾勗爾遵

匡氏褒德之碑

天子既興聖人之治忠孝貞節之旌徧天下而下邳匡氏尤以挺特聞延祐二年九月三日遂以集賢大學士臣顥請賜匡氏褒德之碑臣某奉詔為之文曰匡氏漢丞相衡之裔世居滕後有諱友者與子珍耕于邳皆甚賢鄉人慕之號其居曰匡家穴珍娶劉氏生一子曰才是為元帥公公雄勇多智好讀孫吳書仕金為武略將軍邳徐兵馬都巡使歲壬辰金亡甲午率所部歸國屬

大帥岱齊麾下令招收散亡還守邳境公言邳徐逼宋  
北邊而銅郡孟山宿遷桃源睢口皆要地今不早乘勝  
攻取則邳徐不可守矣帥大然之益兵俾與裨將百家  
奴進擊不旬月五城皆破獲馬都統王都統以歸板授  
沂邳東河監軍丙申邳人袁萬作亂陰連宋將李都統  
兵襲邳公出戰大敗之獲袁萬加沂邳東河監軍諸路  
兵馬使戊戌徐守張彥叛合宋將鮑太尉等來攻復敗  
之擒其將丘太尉等二十餘人進沂邳東河元帥兼建

武軍節度副使子子宗兵大入境戰不利死之時年六十五夫人高氏儒家子亦負奇操歲庚子公計事幙府邳賊夏興乘虛襲破邳執夫人以去夫人大罵不屈賊怒拔刀斫面仆地賊以為死獲免百家奴破賊分其產以畀之幙府因名其田曰夫人莊以旌之公死時夫人年始三十五誓死不嫁子國政六歲而孤所依唯母一日宗兵暴至母子相失母哭曰天乎吾子死匡氏絕矣我生不如死乃冒鋒鏑求於亂屍中得之卒幸全中統

三年李壇叛宋人伺間擊破邳盡俘邳人國政與母與  
焉居之淮安至元十三年宋亡國政率其衆三百餘戶  
北歸從淮東行樞密院伯奇爾穆蘇朝於上都賜宴便  
殿錫以衣服襍帽授承事郎揚子縣丞歷睢寧汶上主  
簿丁母艱起佐濮州遷睢州判官虞城縣尹所至以廉  
惠稱事母尤極孝母年五十疾甚刲肝活之復疾復刲  
肝後數載又疾又刲腦和藥以進疾竟愈母聰明康強  
八十九而終國政廬墓終喪有聲時至廬所若素餐者

郡邑聞而異之曰父死忠母守貞子盡孝有一猶難矧  
兼之耶上其事表其里曰貞孝女一適毛閏孫男二曰  
傑曰慶女四長適陶英次適屯田提舉單禎次適劉江  
次適金師古公之墓在里之先塋夫人高氏祔謹按昭  
文館大學士太醫院使完顏致所狀如右臣某曰匡元  
帥屢立顯功殺身為國雖三遷官皆出幙府時官制未  
行也高夫人不辱其身國政克致其孝有司旌之宜矣  
而國政間闕數千里率衆來歸僅得貳一遠縣世祖之

惜名爵可知己國政陸沉州縣四十餘年曾無幾微顧  
望心不亦賢乎匡氏一門大節焯焯如此然非臣顯不  
能上達非聖天子不能嘉憫而褒顯之則是舉也豈不  
君君臣臣哉銘曰

匡氏維邈有相于漢徙滕蓄懿耕邳遘亂仡仡元戎沉  
幾獨斷爰歸有德振我南翰刈旗馘將捐軀折叛輸忠  
未究居然永歎貼危反覆全家就難蹠血僵戶南遷北  
竄黥戎斫面馴麇繞寔婦貞子孝赫焉炳煥嗣子歸朝

素髮州縣德隆報與立造誰筭文臣為言瘠渥過渙穹碑既揭河昭宿爛抒誠播辭永激頑懦

均州武當山萬壽宮碑

皇慶元年春三月京師不雨徧走羣望不雨詔武當山道士張守清禱而雨明年春不雨禱而雨夏又不雨又禱又雨既霑既渥乃大有秋上寬憂顧下蘇飢窮道術以及物為功諒矣初均房之間有山曰太和又曰仙室以玄武神居之名武當踞地八百里峯七十有二最高



曰紫霄之峯峯之最勝曰南岩岩前有洞天二曰大安  
皇涯之天曰顯定極風之天上出浮雲下臨絕澗猿啼  
鳥嗥豺虎所家人可投足者僅尋丈許道家言龍漢之  
年虛危之精降而為人修道此山道成乘龍上飛是為  
玄武之神至唐貞觀益顯天下尊祀宋理宗時詔道士  
劉真人作宮此岩不克漢東異人魯大有隱居五龍觀  
草居菲食四十餘年救災捍患預知人禍福時人神之  
天兵破襄漢去渡河訪道清和真人西絕汧隴北踰陰

山至元十二年歸與道士汪真常等修復紫霄五龍諸宮獨結茅南岩或請作室廬曰非爾所及也其人將至矣二十一年秋九月師自峽州來年二十一願為弟子大有欣然曰吾遲子久矣即授道要明年春正月大有仙去師躬執耕耨墾山鑿谷種粟麥為食繼帥其徒剪薈翳驅鳥獸通道自山趾三十里至五龍觀又七十五里至紫霄宮又八十里至南岩歲三月三日相傳神始降之辰士女會者數萬金帛之施雲委川赴乃構虛夷

峻捷木穹谷刊石窮厓即岩為宮廣殿大庭高堂飛閣  
庖庫寮次既嚴且潔炫晃丹碧輾轉雲漢像設端偉鍾  
鼓壯亮引以石徑蔭以松杉積工累資巨萬計歷二十  
餘載乃成墾田數百頃養衆萬指至大三年今上皇帝  
儀天興聖慈仁昭懿壽元皇太后聞師道行遣使建金  
籙醮徵至闕賜宮額曰天一真慶萬壽置提點甲乙住  
持制加神號玄天元聖仁威上帝神父啓元隆慶天君  
明真大帝神母慈寧玉德天后瓊真上仙賜師號體玄

妙應太和真人延祐改元春二月皇太后命師乘駟奉香幣還山致祭冬十月集賢大學士臣顥請加賜宮額曰大天一真慶萬壽宮詔翰林學士承旨臣某撰碑文集賢學士臣孟頫書丹中書叅知政事臣世延篆額臣某竊惟聖天子原清靜之本躬垂拱之化父天母地懷柔百神陶成萬類子育兆姓宵衣旰食期底于治可謂至德也矣師以雲棲霞舉之侶而能振道濯德焦心苦志奮樹堂壇以承天休亦可謂豪傑之士矣師闡疏果

毅方嚴質茂雖大祠祭不待沐浴更衣所感必應雖身  
被顯寵如始入山其有道者耶若神之德廣大混茫變  
化無方謂列宿所鍾詎不信然從師至京者曰唐道玄  
云臣某謹拜手稽首而獻詩曰

翼軫之墟均房間白雲峩峩武當山根盤千里阻且艱  
七十二峯羅烟鬟帝遣玄武驅神奸被髮長劒衣黥黥  
穹龜修蛇猛且閒乘雲而來馭風還跂予望之杳莫攀  
真人學道鑄堅頑飛上千仞誅榛管幹旋天樞啓天關

瓊樓珠宮翠回環霞披霧暎黃金鑲湛恩大號帝所頒  
神來居之珮珊珊寒松蕭颼水潺湲飛香滿空馥黃蘭  
願神永永哀民難況掃穢濁撫惻癯我皇萬歲御九寰  
興聖怡愉長朱顏

雪樓集卷五

欽定四庫全書

雪樓集卷六

元 程文海 撰

玉堂類藁

敕賜碑

大元國學先聖廟碑

皇慶二年春皇帝若曰我元膺百聖之統建萬民之極  
誕受厥命作之君師世祖混一區宇亟修文教成宗建  
廟學武宗追尊孔子所以崇化育材也朕纂丕圖監前

人成憲期底于治可樹碑於廟詞臣文之臣某拜手稽  
首奉詔言曰臣聞邃古之初惟民生厚風氣漸靡聖人  
憂之越有庠序學校之制天下之治胥此焉出中統二  
年以儒臣許衡為國子祭酒選朝臣子弟充弟子員至  
元四年作都城畫地宮城之東為廟學基二十四年備  
置監學官元貞元年詔立先聖廟久未集大德三年春  
丞相臣哈喇哈遜達爾罕大懼無以祇德意乃身任之  
飭五材鳩衆工責成工部郎中臣賈馴心計指授晨



夕匪懈工師用勸十年秋廟成謀樹國子學御史臺臣復以為請制可至大元年冬學成廟度地頃之半殿四阿崇尺六十有五廣倍之深視崇之尺加十焉配享有位從祀有列重門修廊齋廬庖庫為楹四百七十有八學在廟西地遜於廟者十之二中國子監東西六館自堂徂門環列鱗比通教養之區為間百六十有七制加孔子大成之號祠以太牢贊釋奠雅樂江南復戶四十四肆之春秋二祀先期必命大臣攝事皇帝御極陞先儒

周敦頤程顥程頤司馬光張載邵雍朱熹張栻呂祖謙  
許衡從祀廣弟子員為三百進庶民子弟之後秀相觀  
而善業精行成者歲舉從政又詔天下三歲一大比興  
賢能於是崇宇峻陞陳器服冕聖師巍然如在其上教  
有業息有居親師樂友諸生各安其學咸曰大哉天子  
之仁至哉相臣之賢工曹之勤其知政治之本源矣臣  
竊謂天地至神非風雨霜露罔成其功斯道至大非聖  
君賢相罔致其化人性至善非詩書禮樂罔就其器列

聖相承謂天下可以武定不可以武治所以尊夫子建  
辟雍復科舉誠欲人人被服儒行為天下國家用耳然  
則黎民於變時雍顧不在茲乎於戲隆哉臣某謹拜手  
稽首而獻頌曰

皇元受命誕惟作京以撫萬邦既訖武功載修文教登  
其俊良於穆宣聖垂範罔極首尊而彰曰爾胄子弗典  
于學曷風四方學以聚之廩以餽之日就月將大德嗣  
服乃建孔廟乃經辟雍考制程材審時相宜適成厥功

辟雍洋洋冕服皇皇群士景從聖道既明渙號既加我  
皇御天執道之中軌物牖民翼翼乾乾帝學益宏庶政  
惟和我化用宣躋祀儒師實興群材丕紹厥先相古盛  
時訏謨遠猶罔不由賢天錫皇祖神聖文武以有萬國  
威何不加令何不行求何不獲惟學是務惟才是育下  
民允迪越厥左右咸有一德以匡乃辟惟帝時憲惟臣  
克念濟濟茂碩禮明樂備永作神主播頌無數

林國武宣公神道碑

世祖皇帝有天下將帥用命士卒効死謀無遺策戰無  
堅敵以成混一之功負掩前古而非偶然之故也威足  
以服其強武足以賈其勇知足以竭其謀仁足以結其  
心功必賞過必罰六者皆任將帥之具惟帝兼之此其  
無敵於天下哉逮夫聖子神孫繼志述事懋延之恩交  
於忠良之裔崇報之詔集於勲舊之門所以勸賢勵能  
報本反始之道亦未有如今日者若林國武宣公拔迹  
行陣列功帝室生都顯官沒昨大國君臣之際胥盡矣

皇慶二年冬天子復命臣某表其世系詮其行事揭諸墓道以著功臣之思於戲何其盛耶臣昔待罪行御史臺識武宣於揚州嚴威篤實偉人也臣今幸得執筆史官奉明詔雖甚朽鈍不敢辭讓謹按公諱旺扎勒圖巴圖爾欽察人自丙辰歲以材武從軍己未扈從攻武昌先登中統三年從諸王噶必齊征逆璫於濟南再合戰再破之至元四年略地荆南至襄陽與宋師遇戰勝之洎攻襄樊水陸大戰凡四連勝之遂梯樊城焚樓櫓勇冠軍

幙府上功授武略將軍新軍千戶從丞相巴延丞相阿珠破沙洋新城繇沙武渡江功多賜金符十二年春與宋將孫虎臣戰丁家洲敗之改武義將軍夏戰揚子橋秋戰焦山冬破常州明年夏攻泰州新城功尤多江南平策勲賜虎符遷信武將軍管軍總管高郵軍達魯噶齊軍陞路仍達魯噶齊進懷遠大將軍加昭勇大將軍十八年聞賊陳吊眼亂詔以鎮國上將軍福建等處征蠻都元帥往討之賊據三饒千壁嶺明年破其營擒之

至漳州斬以徇又明年加管軍萬戶兼高郵路達魯噶齊又明年改高郵萬戶府達魯噶齊二十三年入朝進驍騎衛上將軍江浙等處行中書省左丞兼管本萬戶軍未幾行省遷揚州置宣慰司浙西以中書左丞行浙西宣慰使初江淮行樞密按塔哈出征日本難其代有司以公奏上深然之未行而院革會福建置行省復奏公為左丞上方倚公以遠不許過有江浙之命二十五年遙授尚書左丞兼管本萬戶軍馬宣慰如故復行省



于抗立淮東宣慰司于揚州行淮東宣慰使二十七年  
改資德大夫江西等處行樞密副使兼廣東宣慰使元  
貞元年入覲拜榮祿大夫江浙等處行中書省平章政  
事大德元年閏十二月八日以官薨年五十九明年二  
月二日葬于高郵城西十五里茆塘之原至大元年制  
贈効忠宣力定遠功臣開府儀同三司太尉上柱國追  
封林國公謚武宣配某氏追封林國夫人最公前後以  
功被賞者凡八白金以兩計者六百成器者一楮幣以

總計二千四百有九十織金服一襲馬一匹鞍轡弓矢  
各一副公自荷戈戎行摧堅挫銳小大十七戰戰輒勝  
及為高郵興學勸農政平訟理年穀豐熟人無夭札四  
方之民襁負而至郡有虎手格殺之生致其二人為立  
生祠浙盜猖蹶煮海為鹽為公私害公下車收捕籍為  
軍民以無事烏乎謚法折衝禦侮曰武宣力四方曰宣  
易名武宣不亦宜乎此固天授聖主然非世祖知人之  
明當天下方興之運雖有超世之姿拔俗之材孰能樹

功立業若此哉矧當軍旅用事而治民獨懇懇焉如古  
循吏抑又難矣臣又聞有同人郭萬戶者援公例求虎  
符上謂叅知政事特穆爾曰彼戰勝攻取若之乎輸忠  
竭力若之乎所至無不合朕心若之乎所授無不如朕  
志若之乎彼胡可比旺扎勒圖巴圖爾樞密院量其功賞  
可也方至元入見時公感疾敕太醫往視尚方賜飲膳  
又數數賜問疾未間則憂小差則喜及其愈也賜醫者楮  
幣萬緡烏乎待臣若此而有不盡忠者乎公誠千一之

遇矣曾大父某大父某父某子男十四人長特穆爾特  
古斯襲高郵上萬戶府達嚕噶齊遷資德大夫遙授右  
丞准東淮西道宣慰使兼管本萬戶軍馬次伯勒齊固圖  
繇江浙行省左丞為資善大夫燕南河北道肅政廉訪使  
次婁圖武德將軍常州路無錫州達嚕噶齊次布哈次  
伯勒齊武略將軍湖州路長興州達嚕噶齊次察爾特  
穆爾忠顯校尉高郵打捕屯田提舉曰達嚕噶齊次拜布  
哈次成格勒次徹伯爾琨為浮屠氏次巴拉次赫赫次察

察爾次佛保次華善女四人長適昭勇大將軍戶部尚  
書且實勒次適司徒洪塔喇海次適張托音次適揚州  
路泰興縣丞游德宣孫男二十三人長曰錫桑襲明威  
將軍鎮守揚州高郵上萬戶府達魯噶齊女十三人曾  
孫男一人女一人銘曰

桓桓武宣奮自我伍精銳霆行猷謀神與始從王師江  
漢之潯山東倣擾奪其旗鼓我師載南洸洸虎旅方城  
失險淮海遙沮城必先登戰莫能禦豈惟天命亦以公

武何以報之綰符疊組蹈江躒閩跨吳魚楚以蕃以宣  
爰遏爰撫賊授其首鹽無私煮廩有歸頑野有遺泰嚴  
嚴生祠穹碑翊翊惟公之疾憂勞聖主惟疾之愈喜形  
常寧惟帝之知惟功之叙云胡不憇摧我梁柱何以贈  
之大爵廣土我思世祖光宅海宇知人善任相照肺腑  
寒者煦之清風其暑風興夜寐如覲堯禹我瞻武宣高  
原撫撫平生之言永隔幽阻天子聖仁德婉皇祖勒銘  
貞石式憲千古

武都智敏王述德之碑

有元延祐元年春閏月癸未晦上御嘉禧殿詔賜大司徒瑪努勒父武都王述德之碑命平章政事翰林學士承旨秦國公孟諭詞臣為文夫褒功崇德無遠弗錄以勸百工弼成孝治者天子之事也追求往牒論撰世美播之金石勒示永久者史臣之職也臣幸得待罪太史敢以穢陋辭謹按武都王諱默色斯伯什巴里人世出輝和爾族大父諱巴拉瑪妣曰伊德根父諱阿爾齊蘇為

本部都統妣曰巴噶呼圖克王幼負奇質年十五盡通  
本國書太祖聞其名徵至闕下一見大悅曰此兒目中  
有大他日可大用授之睿宗俾視顯懿莊聖皇后邑入  
會計愜當復事世祖日見親用憲宗賓天王首勸進曰  
皇帝奄棄臣民神器不可以久曠太祖嫡孫惟大王最  
長且賢宜即皇帝位諸王塔齊爾額森格哈丹等咸韙  
其言乞從所請世祖踐阼眷賚益隆會立中書省平章  
政事王文統奏以為相不拜南征時與近臣布扎爾為



斷事官及諸王阿哩克布克叛相距漠北布扎爾有貳心  
王知之奏徙中都親監以往上以為忠數命收召豪俊  
罔羅側陋使車所至凡所引薦皆極其選詔與安圖並  
拜為丞相又固辭上語丞相安圖丞相巴延御史大夫  
伊羅勒諾延等曰賢哉默色斯求之彼族誠鮮矣夫王  
剛嚴闡敏周慎端信早居帷幄謀謨密勿世莫得聞方  
倚之鈞陶天下柱石廊廟謂宜銘功象鼎圖形麟閣竟  
以至元四年四月六日薨年六十二三宮震悼庶尹流

涕曰奪我良臣昭睿順聖皇后出內帑買地京城之西  
高良河之上以禮葬焉特謚敏惠公武宗繼聖追念先  
猷制贈推忠同德佐理功臣太師開府儀同三司上柱  
國追封武都王改謚智敏配輝和爾氏曰布色穆爾翁  
吉喇特氏曰齊達勒並追封武都王夫人布色穆爾生  
子四托音榮祿大夫宣政院使太府卿特穆爾布哈通奉  
大夫翰林學士承旨賽音哲爾朝列大夫安西路同知總管  
府事伊德爾平梁府達魯噶齊女二長適平章政事庶某

次適輝和爾氏齊達勒順聖皇后諸妹也生子五瑪努勒  
今開府儀同三司大司徒章佩卿阿實特穆爾終翰林  
學士承旨金紫光祿大夫領太常禮儀院事贈推誠保  
德濟美功臣開府儀同三司上柱國追封武都王謚忠  
簡竒塔特布哈早世舒克丹懷遠大將軍吉州路達魯噶  
齊額古爾布哈資善大夫中書左丞女三長適輝和爾氏次  
適杭州總管劉紹慶他姬子二和尼齊雲南都元帥唐  
古特中奉大夫四川等處宣慰司副都元帥孫男二十

四女三托音子曰察罕雅遜資德大夫四川等處行中書省左丞僧家努行大司農少卿布尼雅錫哩同知澧州路總管府事烏舍唐州達魯噶齊塔納錫哩宿衛士瑪努勒子曰阿勒坦早世多爾濟巴勒翰林侍讀學士女長適都水監卿特穆爾格次適翰林待制王哈喇布哈次適大司徒阿僧格阿實特穆爾子曰拜特穆爾廬州路達魯噶齊呼圖克真州達魯噶齊科綽太常少卿和尼宿衛士伊埒布哈子曰格爾檀州達魯噶齊長安特穆爾布哈子

曰哈噶德福托里布哈長壽伊德爾子曰阿斯蘭開成路  
達魯噶齊和尼齊子曰舒蘇布哈唐古特子曰多爾濟嘉  
琿伊伯格勒長尚巴延徹爾曾孫男琳沁巴勒女二人皆  
大司徒孫也竊惟太祖皇帝仁聖神武聞一介童孺之  
賢卽萬里徵聘而不疑卒能收功帝室垂裕後昆前古  
帝王所未嘗有武都王生遺華要沒享榮名慶流子孫  
光輔累聖聯輝竹帛襲迹王侯非天之所啓耶銘曰

殷湯聘莘周文獵渭賢知斯立遐邈誰棄於赫太祖高

視曠世暨暨武都拔自童稚萬里就徵因敢或貳聖子  
神孫男女大器目光爛爛出類拔萃儲精藝牘策足委  
積謀猷帷帳摧堅拉銳翼戴功成再辭相位聯姻戚畹  
身忘其貴海內延頸思圖至治云胡不憇埋忠九地載  
鍾賢嗣克述克繼夙夜在公鞠躬盡瘁群公列卿分符  
析瑞中朝讓能遐壤懷惠河山啓土如帶如礪光融奕  
葉期且千祀豐碑有辭天子錫類

海雲簡和尚塔碑

達摩以禪宗倡南海上六傳為大鑒又五傳為臨濟又十六傳而為佛日圓明海雲大宗師師歷事太祖太宗憲宗世祖為天下禪門之首沒後五十八年改元延祐春三月丁未集賢大學士臣顯昭文館大學士臣明埒棟阿奉詔加謚光天普照佛日圓明海雲祐聖國師修其塔命翰林學士承旨臣某為文刻石臣某謹按師名印簡宗姓嵐谷寧遠人七歲授孝經開卷問開者何宗明者何義父母奇之俾從浮屠顏公祝髮明年師沼公

授經論通講說居嵐州廣惠寺日乞食以養餘即為粥以食餓者金宣宗聞之賜號通玄廣惠大師天兵破嵐州以師及治公歸賜號寂照英悟大師稱之曰小長老治沒弟章公住燕之慶壽寺有名往依之章昔夢師來即請為記室又思治沒時屬師有賀八十之語心獨喜年十九住興州仁智寺歷燕之慶壽竹林易之興國興安之永慶昌平之開元真定之臨濟雲中之龍官華嚴諸大刹而主永慶者二慶壽者三放浪遼海上手刺血



和金泥書大乘三聚戒本十有六部布之天下為國祝  
釐焉四方賂遺洎累朝賜予金帛珍寶巨萬惟以之建  
寺齋僧振貧乏而已凡主大會七度弟子千餘名王才  
侯受戒律者百數士民奔走依向者以千萬計皇太后  
尤深敬禮累號燕趙國大禪師佑聖安國大禪師先天  
鎮國大士丁巳四月三日趣畫天風海濤飛雲之狀于  
華嚴之西壁詰朝而逝年五十六喪車行諸主鉢納合  
等秉爐前導火舉有黃金梵相飛出白鶴羣舞于上烟

燼所泊皆成舍利五色或大如彈丸還葬慶壽之西南隅賜諡佛日圓明大宗師諸大弟子分舍利葬秦趙間者為塔七始師由山西來燕夜宿松鋪岩下因擊火大悟復叅一公玄公章公諸碩師道大顯白與公卿大臣言必語以輔國安民時相夏里之徒方事嚴刻師勸以平政息役以弭災蝗體仁本恕以正刑賞選俊又罷游獵以養國體孔孟之道萬世帝王法程宜加表樹以興學校世祖在潛邸數延問佛法之要在家出家異同對

曰佛性被一切處非染非靜非生非滅何有同異殿下  
親為皇弟重任藩寄宜稽古審得失舉賢錯枉以尊主  
庇民為務佛法之要孰大於此會朝廷將試天下僧丞  
相以問師曰山僧元不看經一字不識因問師曰國家  
先務節用愛民鉏奸立善以保天命我輩烏足計哉上  
聞而嘉之裕皇始生師摩頂訓之名壬子夏授以銀章  
領天下宗教事非所樂也以其徒朗公輩攝之是年新  
大興之普濟禪寺特更賜額海雲至元四年城京都有

司定基正直師塔命遷三十步許環之唯師之道高廣  
洞達慈濟篤實儒言而佛歸其道易知其化易行所以  
致褒寵於列聖揚休光於奕世非偶然也有語錄曰雜  
毒海行于世銘曰

粵若達摩肇迹南海廿有七傳至師而大惟師生知默  
識頓悟秉時鍾運歸我聖祖少躋講肆長歷壇場孔艱  
且勤厥道用先智而弗作惠而弗有彌虛而塞彌靜而  
久雷行四朝風動九壤飛琛走貨雲謝電往濟濟王侯

摠摠學人問法指心求治以身德教並流內外摠統弗  
合弗離弗滌弗壅汝懸我解汝溺我援泮渙萬流忽為  
一源惟師之道倬爾有煒寺標海雲塔遷城趾惟明天  
子是信是尊渙號孔嘉宜爾萬年

靳同知墓碑

天子治隆海內仁周天下閔勞卹善罔有內外言朝以  
入恩夕以出榮生哀死達于顯幽聖人之德至矣哉延  
祐二年春正月己巳上御嘉禧殿集賢大學士臣顯言

在昔金季平陽人靳和能識帝王之真率衆三千歸我  
太宗皇帝太宗嘉之錫以虎符官以鎮南大元帥俾擊  
葛伯鰲背彈平青龍諸砦拔之壬辰秋復從破河南授  
絳州軍民長官以死其子用服勤州縣出入臺憲民懷  
其惠吏畏其威者五十餘年今天不慙遺奄然死矣父  
子忠藎未及大用臣實悲之冢上之刻惟陛下幸焉於  
是詔翰林學士承旨臣某撰文臣賡篆額集賢侍讀學  
士臣個書丹臣某謹按府君諱用字佑之漢汾陽侯強

之後世為平陽曲沃人父和勇而好義以乙酉歸國甲寅致仕至元二年秋八月朔年六十七終府君六歲學於張理之日誦數百言十六見諸王拔都命長平陽工人遷曲沃翼城令有能聲至元六年改榮河尹奉法循理勸農興學賦役平允人用大和十二年移汲汲當南北衝民鮮事影會江南新破饗給繇重吏多引去府君曰君命也我不可以效之乃發倉廩以賑匱乏開東道以便輸役悉視民之利病而罷行之歲中墾田至七百

餘頃部使者王博文郡太守董文用察舉廉能尹襄陵  
居數月入為右警巡副使事至立斷豪貴側目二十二  
年拜監察御史二十四年僉陝西漢中道提刑按察司  
事二十八年僉嶺北湖南道肅政廉訪司事所向風動  
而湖南地控嶺海榔桂之間部使罕至吏暴民困寇盜  
時作府君入境招徠逃散震斥頑獷民賴至今大德改  
元知解州解人多藉煮鹽怙威凌冒發其奸狀盡繩以  
法使府却立莫敢抗八年擢岳州路治中會建寺五臺



山詔選可任本寺規運所提點者有司以君應詔到官  
期月廩庫充溢乃上言乞骸骨歸里以朝列大夫同知  
晉寧路總管府事致仕日與山僧野老彈琴詠詩以樂  
餘齡皇慶二年十有一月某日乃始生之旦家人以次  
上壽畢坐而言曰吾壽命已終永訣于此言訖而沒春  
秋七十有六越五日權厝宅之西園送者數千人嗚呼  
惟府君公忠廉愛剛直謹簡故能臨民以德執法不阿  
所至立祠勒頌不忘厥懿而敷歷五十餘年十九在外

不獲密通清光大展厥猷為可憾爾嘗聞府君為御史時御史大夫伊埒諾延引至上前適有獻白海青者上顧曰卿為御史摧奸擊暴亦如此禽乃不負耳府君拜曰敢不欽承天子威命嗟夫君臣之間一見之頃遇物相戒如此而有不治者乎今上雖弗及親用其人猶以臣顯一言追褒前美不遺踈逖群臣於此得無感於心乎至矣哉聖人之德也府君娶賈氏有子六人德政進義校尉邳州判官德仁早世德信將仕郎泗州等處打

捕屯田提舉德謙德淵禁直宿衛德昌好學善屬文將  
以某年某月某日葬府君於某處銘曰

在帝太宗握符御乾天威所加鳥駭獸遷仡仡鎮南其  
徒三千歸于有仁金虎是懸功不待竟去不待年孰成  
其忠大夫翩翩煦之春陽濯之秋鮮野有禾稼邑有誦  
弦才長景促南陌東阡逖逖晉郊洋洋平川彼高者丘  
懷哉此賢驚鳥之喻其言如天有詔勒辭過者下焉

雲國公楊氏世德碑

弘農楊氏自太尉震有功烈於漢重休襲嘉達于我朝  
益烜其光皇帝嗣位之二年夏六月制開府儀同三司  
壽國公燕京間為雲國公明年詔以馴象五曳豐碑樹  
先塋命詞臣撰文大顯楊氏嗚呼楊氏之先其盛德矣  
乎其有忠孝之節匡濟之志而不克究施乃大啓于今  
乎將水不積不深德不積不昌衍大熾盛固自有時乎  
謹按雲國公五世祖諱興隆始居汴事金章宗為軍帥  
年三十八而卒生子諱永昌值金亂湛浮井邑以壽終

有子諱福一諱阿里忼愾多大略年十六襲祖父官國  
亡率衆來歸從憲宗攻潼川將砲卒萬餘戰釣魚山死  
之子諱德榮年幼失怙從家大同輕財好義有鄉曲之  
譽是為雲國公之父中統五年外祖母魏國慶育夫人  
巴氏薦其名裕宗召至京師命給事順宗邸至元二十  
二年某月某日卒葬京城北之狼家夫人富察氏陳氏  
祔是歲雲國公夫人李氏入宮為今上乳母大德十一  
年春三月雲國公佐上平內難武宗即位立上為皇太

子錄阿保翼戴之勞封壽國公李氏為壽國夫人至大  
元年正月授開府儀同三司四年秋閏月追贈曾祖父  
資德大夫中書右丞上護軍諡安惠祖父儀同三司大  
司徒柱國諡武莊父開府儀同三司太傅上柱國諡康  
懿並追封壽國公曾祖妣富察氏祖妣陳氏妣陳氏富  
察氏並追封壽國夫人李夫人以受封之秋卒祔葬先  
塋惟雲國公自世祖以來歷事累朝咸被顯寵前後受  
賜金幣奇服重器不可勝計皇帝御天下皇太后受天

下養眷遇益隆恩賞益厚遂封兩國贈先世賜甲第官  
其子安寧典寶大監弟篤思繇中議大夫太子右庶子  
起家通歷清要九轉為資善大夫領北等處行中書省  
左丞妻張氏封弘農郡夫人蓋楊氏數世願忠而不假  
以命願孝而不遂其志積慶浚澤以底于今一旦聯主  
而朝列鼎而祭高爵厚祿榮及祖孫乃基于慶育之一  
言而以李夫人興豈非天之所命耶昔漢東武侯母嘗  
養武帝被恩穠渥貴重一時而其子孫奴從者弗率幾

危於讒賴帝慈仁獲守富貴若楊氏父子兄弟事上克勤遇下克恭難不顧身寵不忘危其能保功名垂竹帛光祖宗刻金石也宜哉抑其先固建之以德耶李夫人乃不少延悲夫銘曰

茫茫陝郊遯矣弘農太尉興漢代侯世公金流大梁乃樹元戎材與時違躋志以終受命天朝魚山繼忠太傅忠厚起家大同竟闢雲土大開厥逢婉婉淑媛養帝九重英英伯仲執事東宮出入艱勤夷險匪躬翼聖扶危



載績武功群蒙塞披日升于中列爵既疏茅土是封胡  
在先世德盛而窮胡在今日位高而豐匪善之埤曷報  
之隆惟帝之德惟臣之恭作此銘詩式示顯融

袁州大仰山重建太平興國禪寺碑

皇元有天下佛法益尊大天下名山思致崇極以稱德  
意皇慶元年袁州大仰山重建太平興國禪寺成有司  
圖上其事詔加封開山祖師小釋迦曰慧慈靈感昭應  
大通正覺禪師二神曰顯德仁聖忠佑靈濟廣慶王曰

福德聖仁忠衛康濟順慶王命詞臣發揚烈休勒垂堅  
珉臣某謹按唐宰相陸公希聲塔銘師名慧寂世韶州  
族葉氏文宗朝從為山大圓師悟曹溪心地直指之奧  
又從國師志和尚得立機境智之妙又按宜春圖經會  
昌元年師來自郴遇二白衣神指其地居之蓋方是時  
國正侮蔑佛法學徒陵遲幾不自立而師應七葉之運  
龍縱此山歷歲數百其道大暴於天下斯亦奇矣神蕭  
姓伯大分次隆初宅水上游忽夜半風雨遷廟于堵田


漢晉以來或淖高原為田或助官軍弭盜禦灾捍患神  
恠不可度已迄今水旱疾疫之禱輒響應廟而祀者幾  
半天下非聰明正直能致然耶神得師而化乃宏師得  
神而道益彰故合祠于師之室封秩必俱大德癸卯冬  
十有二月乙亥寺灾明年長老希陵圖復厥宇冰涉暑  
陟不懈輸幣薦貨者川至為殿閣各四樓亭各二堂六  
祠一若方丈衆寮若門廡軒庭若庾庫庖湑以區計廿  
有八丹碧煥燦制度宏密廣員倍于舊而加美焉攢峰

突嶂靈潭健瀑風景不改于昔而增勝焉十方來者莫  
不驚異讚歎愴怛四顧而忘歸又建棲隱禪院于城南  
門為出入祝釐之所噫勤矣陵何氏世以儒顯金華去  
為釋嗣雪嵒欽師之學為晚濟十八葉孫外弘而內峻  
學禪而行律故施諸其徒則尊嚴整齊而學成者衆示  
諸行事則感動聽信而業樹者隆凡三錫命曰大圓佛  
鑑禪師於戲是道也藏用於體則靜無不為推體而用  
則動無不虛慧慈以之承六祖開名山二神以之輔有

道惠四方佛鑑以之廓教基宏法緒其致顯累朝宣光  
聖代北儕秦華南友衡廬歸乎大江之右微而著毀而  
完豈徒然哉繫之辭曰

惟大仰山周八百里據楚之表昔有神人伯仲赫靈廟  
食其間在唐武宗粵小釋迦至自郴山歷澗絕谷神獻  
異境瓶鉢以安躡危躒難道喪不悖既固既完湜湜曹  
溪益濂而疏流為大川畎滌澮決廣治混冥會于一源  
道得其正地得其勝來學日繁後五百年室燬徒隳適

啓聖元莫盛匪今莫高匪禪或鑄而刊乾乾佛鑑統壹  
儒釋有光厥先揚瀉激濟惡衣糲食以示學人學人若  
林直指其心有覺有聞表正失惑遐邇丕變順風駿奔  
崇構拓趾高朗博碩如祇陀園青山為城白雲為屯翼  
翼言言由甲底壬克潰厥成孔勩且勤職司上言天子  
嘉之景命攸敦於赫慧慈洎于大神鼎峙齊尊靈宮既  
抗休號允鑠尚迪恩綸天清地寧保有無疆壽我聖君  
太史稽首播頌萬億永殿山門



雪樓集卷六